

## Jungbürgerfeier vom 4. Dezember 2013

Liebe junge Loupnerinne u Loupner

Was verzellsch däm Hüüfeli junge Lüt ar e Jungbürgerfir? Die Frag beschäfiget mi sit es paarne Tage u Wuche u isch mer fasch e chli uf em Mage gläge. I gange mau drvo us, dass dihr alli nid dahäre sit cho, für guet gmeinti Ratschläg z'lose. Das heit dihr i de vergangene 18 Jahr äuä scho meh aus gnue über öich müess la ergah, vo Eltere, Lehrmeischter, Lehrpersone oder angerne Lüt, wos guet gmeint hei mit öich – villecht sogar vo mir, wes nech preicht het i mini Schuelklass...

Aber son es bitzli ghörts haut scho zur hüttige Fiir, dass men öppis verzellt vo Rächte und Pflichte. Üsi Gsellschaft cha nume funktioniere, we sech alli einigermasse a d'Spielregle halte. O für öich gälte neui Spielregle sit em 18 Geburtstag. Für öich isch es nöi, dass dihr itze volljährig sit. Dihr sit mündig, dihr chöit (äntlech) in eigeter Verantwortig handle, öii Verantwortig wahrnäh. Ja, u was beschert nech die Volljährigkeit?

Stüüre zahle. Abschimme, wähle, sich la wähle? Nid alli si i däm Alter politisch motiviert. Und überhaupt: Über Räntenalter abstimme? Über Umwandligssätz vor Pensionskasse bestimme? Bis dihr pensioniert sit, fliessst no viel Wasser d'Sensen u d'Saanen ab. Warum scho hütt da drüber nachedänke?

Oh ja, itz törfet dihr äntlech o ohni schlächts Gwüsse ir Landi oder im Coop es Carton Bier ga choufe. Dihr törf es Auto fahre. Dihr törf – es isch eso - o hürate. Für ds nöie Handy-Abonnemänt müsst dihr o nümme bi den Eltere verbi. Dihr chöit nech sälber la versichere – vielleicht heit dihr ja scho Bsuech übercho vo eim vo dene Versicherigsgäante? Kredite üfnäh, das chöit dihr o, ohni ds Mammi oder dr Papi z'frage. Verträg ungerschribe – mit ere Bank, mit ere Versicherig, emene Kreditinstitut. Für die Institutione sit dihr i däm Jahr zu wichtige Chunde worde. Versicherige abschliesse, Verträg ungerschribe heisst aber o, dass dihr nech verpflichtet, gwüssi Abmachige de o iizhalte. Dihr müsst sälber für öppis grad staht. Das bedütet o, sälber Verantwortig z'überäh u nümme eifach uf Mammi u Papi zelle.

Verantwortig heisst das Zouberwort, won i itz schon es paarmau gseit ha. Dihr übernähmet Verantwortig, für öich, für öies Läbe, für öii Usbildig. Und e chli heit dihr ab öiem 18. Geburi o Verantwortig für d'Gsellschaft überno, öb der das itz weit oder nid, ob der mitmachet und öich engagieret oder eifach die angere löht la mache; ir Hoffnig, das chömm de scho guet oder ir Meinig, dihr chönnet ja glich nüt ändere oder die angere machi sowieso, was sie wölli oder dihr heiget bessers z'tüe.

«Verantwortung ist eine abnehmbare Last, die sich leicht Gott, dem Schicksal, dem Glück, dem Zufall oder dem Nächsten aufladen lässt. In den Tagen der Astrologie war es üblich, sie einem Stern aufzubürden.» Das het dr Ambrose Bierce gseit, en amerikanische Schriftsteller und Journalist (1842-1914). U ganz gärn miech mes ja de o so. Verantwortig ablade. Angerne d'Sach übergäh. Dr lieb Gott la mache. Aber es isch angers, zum Glück!.

I möchte öich ermuntere, d'Verantwortig nid einfach abzgäh. Verantwortig isch nämlech on e Chance. U gället: Verantwortlich isch me nid nume für das, wo me macht, sondern o für das, was me nid macht. So oder ähnlich het das der Laotse gseit, e chinesische Philosoph.

Nätürlech het alles, wo me im Läbe macht (oder äbe nid macht) o witterchendi Konsequänze. Und es isch o legitim, Fähler z'mache oder fartschi Entscheidige z'träffe. Wichtig wär de haut nume, dass o me drus lehrt u die Fähler nid wiederholt.

Zum Schluss no öppis: Blibet (oder wärdet) o neugierig. D'Neugier verleitet eim villecht schon es Mau zu öppis Übermüetigem, öppis Gschpunnigem. Aber nume die, wo neugierig si, machen im Läbe die wärtvolle Erfahrigie. Verantwortlich si, neugierig si: Wär das isch, däm tüe sech Türen uf im Läbe. We me Verantwortig zeigt u d' Neugier laht la gumpe, däm bietet ds Läbe viel meh, jede Tag.

I däm Sinn wünschen ig öich uf öiem witere Läbeswäg viel Glück und Erfolg. Machets guet!

René Spicher